

# Erngup nukinganik nukissiornermut atugassamik misissueqqaarnermut atuinermullu atatillugu akuersissutitut akiliutit aamma suliassanik suliarinninnermi aningaasartuutit utertillugit akilerneqartarnerat pillugit Namminersorlutik Oqartussat nalunaarutaat

Erngup nukingata nukissiornermut atorneqartarnera pillugu Inatsisartut inatsisaat nr. 5, 27. november 2018-imeersumi § 12, imm. 2 naapertorlugu aalajangersarneqarput:

## *Akiliisussaatitaasut*

§ 1. Nalunaarut manna malillugu akiliisussaatitaapput:

- 1) Erngup nukingata nukissiornermut atorneqartarnera pillugu Inatsisartut inatsisaat naapertorlugu pisinnaatitsissummik pigisaqartut.
- 2) Erngup nukinganik nukissiornermut atorneqartussamik misissueqqaarnissamut akuersissummik qinnuteqartut.
- 3) Erngup nukinganik nukissiornermut atuinissamut akuersissummik qinnuteqartut.

## *Aningaasartuutininik naatsorsuineq*

§ 2. Suliassanik suliarinninnermut, ilanngullugu nakkutilliineq, aningaasartuutit, nalunaaquttap akunnerisa suliassat ataasiakkaat suliarineqarneranni atorneqartutut nalunaarsorneqartut amerlassusaannut naatsorsukkat tunngavigalugit naatsorsorneqassapput.

*Imm. 2.* Nalunaaquttap akunneranut akigititaq sulisunut suliassamik suliarinninnermi peqataasunut agguaqatigiissillugu aningaasarsianut aningaasartuutit, ukiumi naatsorsuusiorfusumi pineqartumi allaffissornikkut aningaasartuutit allat suliassamik suliarinninnermut atasut naleqqersuussilluni annertussusilerlugit ilassutigalugit, tunngavigalugit aalajangersarneqassaaq.

*Imm. 3.* Aningaasartuutini ilaasinnaapput misissuinerit, siunnersortininik ikiorteqarneq, ilanngullugu oqartussanit allanit ikiorteqarneq, sulilluni angalanerit, nerisaqarneq unnuinerillu, oqalutseqarneq nutserisitsinerillu, akiligassiisuteqarneq malillugu suliassanut ataasiakkaanut suliassamik suliarinninnermut tunngatinneqarsinnaasut.

## *Misissueqqaarnissamut akuersissummik akiliut*

§ 3. Erngup nukingata nukissiornermut atorineqartarnera pillugu Inatsisartut inatsisaanni § 4 malillugu erngup nukinganik nukissiornermut atugassamik misissueqqaarnissamut akuersisummik tunineqarnissamik qinnuteqaateqarnermi akiliummut 10.000 koruunit akilerneqassapput.

*Imm. 2.* Akiliutip akilerneqarsimaneranut uppersaasat ilaatinneqanngippat, qinnuteqaat itigartinneqassaaq.

*Imm. 3.* Qinnuteqaat suliarineqassanngitsoq aalajangertoqassappat, akiliut qinnuteqartumut utertillugu akilerneqassaaq.

§ 4. Erngup nukingata nukissiornermut atorineqartarnera pillugu Inatsisartut inatsisaanni § 4 malillugu misissueqqaarnissamut akuersisummik tunniussineri akiliummut 25.000 koruunit akilerneqassapput.

*Imm. 2.* Erngup nukingata nukissiornermut atorineqartarnera pillugu Inatsisartut inatsisaanni § 4, imm. 2 malillugu piffissaq akuersissuteqarfusoq sivitsorneqartoq nalunaaruteqarnermi akiliummut 25.000 koruunit akilerneqassapput.

*Imm. 3.* Immikkut ittunik pisoqartillugu, Naalakkersuisut naliliippata misissueqqaarneq sivikitsuinnaassasoq aammalu killilimmik annertussuseqassasoq, akiliut imm. 1-imi taaneqartoq 5.000 koruunit annikillisinneqarsinnaavoq.

*Imm. 4.* Akiliut akilerneqareerpat akuersissut tunniunneqartoq aatsaat atuuttussanngussaaq.

#### *Atuinissamut akuersisummik akiliut*

§ 5. Erngup nukingata nukissiornermut atorineqartarnera pillugu Inatsisartut inatsisaanni § 5 malillugu erngup nukingata nukissiornermut atorineqarnissaanut atuinissamut akuersisummik tunineqarnissamik qinnuteqarnermi akiliummut 50.000 koruunit akilerneqassapput.

*Imm. 2.* Akiliutip akilerneqarsimaneranut uppersaasat ilanngunneqarsimanngippat, qinnuteqaat itigartinneqassaaq.

§ 6. Erngup nukingata nukissiornermut atorineqartarnera pillugu Inatsisartut inatsisaanni § 5 malillugu atuinissamut akuersisummik tunniussineri akiliummut 100.000 koruunit akilerneqassapput.

*Imm. 2.* Akiliut akilerneqareerpat akuersissut tunniunneqartoq aatsaat atuuttussanngussaaq.

#### *Akiliutinut akigititanik iluarsineq*

§ 7. §§ 3-6-imi akiliutinut akigititat Kalaallit Nunaannut atuisartunut akigititanut naleqqersuut tamanut saqqummiunneqartoq kingulleq tunngavigalugu ukiumoortumik 1. januar iluarsineqartassapput (januar 2020).

#### *Suliassamik suliarinninnerup annertussusaa pillugu ilisimatitsissuteqarneq*

§ 8. Erngup nukinganut tunngasut ingerlatassat pilersaarutigineqartut malitsigisaannik ukiup tulliani suliassamik suliarinninnerup annertussusissaatut naatsorsuutigineqartoq pillugu Naalakkersuisut akiliisussaataasooq ukiumut ataasiarlutik ilisimatittassavaat.

*Imm. 2.* Paasissutissanut imm. 1 naapertorlugu tunniunneqartunut tunngatillugu ukiup ingerlanerani annertuunik allannguuteqarpat, imaluunniit suliassanik suliarinninnerup annertussusaa, erngup nukinganut tunngasut ingerlatassat pilersaarutigineqartut malitsigisaannik nalinginnaasunit, annertuumik annertuneruppat, akiliisussaataasut tamatuminnga piaartumik ilisimatinneqassapput.

*Aningaasartuutinik akiliisitsineq*

**§ 9.** Suliassanik suliarinninnermut aningaasartuutitut piffissakkaartumik akileeqqusinerugallartunik Naalakkersuisut nassiussisinnaapput.

*Imm. 2.* Ukiup naatsorsuusiorfusup naareernerata kingorna, aningaasartaannut ukiumi pineqartumi akilerneqartussanut inaarutaasumik naatsorsuinernik, Naalakkersuisut suliaqassapput. Aningaasat taakkua akilerneqarallarsimasut aningaasartaannut aammalu §§ 3-6 malillugit akiliutitut akilerneqarsimasut aningaasartaannut, iluarsineqassapput.

*Akiliinissamut piffissaq killigititaq*

**§ 10.** Nalunaarut manna malillugu aningaasartaannik akiliineq, tamatuminnga akileeqqusinerup nassiunneqareernerata kingorna kingusinnerpaamik ullut 30-it qaangiunneranni, pissaaq. Taamaattoq akuersissummik qinnuteqarnermut akiliutit §§ 3-6-imi allassimasutut akilerneqassapput.

*Imm. 2.* Aningaasat akilerneqartussat piffissaq eqqorlugu akilerneqanngippata, kingusinaarluni akiliinermi il.il. ernialiisarneq pillugu inatsimmut naapertuuttumik ernialiisoqassaaq.

**§ 11.** Nalunaarut ulloq 17. juni 2022 atuutilerpoq.

Kalistat Lund

Nunalerinnermut, Imminut Pilersornermut, Nukissiuutinut Avatangiisinullu Naalakkersuisoq

/ Mette Skarregaard Pedersen

Namminersorlutik Oqartussat

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut